

**Zeitschrift:** Igl Ischi : organ della Romania (Societat de Students Romontschs)

**Herausgeber:** Romania (Societat de Students Romontschs)

**Band:** 69 (1984)

**Heft:** 22

**Artikel:** Il suicid

**Autor:** Bundi, Gian

**DOI:** <https://doi.org/10.5169/seals-881618>

### Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

### Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

### Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

**Download PDF:** 30.07.2025

**ETH-Bibliothek Zürich, E-Periodica, <https://www.e-periodica.ch>**

## Il suicid

da Gian Bundi

### Resumaziun

Jeu emprovel da dar ina cuorta investa ella problematica dil suicid. Buca perquei che jeu sundel necrofils, mobein perquei che jeu sundel perschuadius che mintgin da nus vegn inagada ni l'autra en contact cun ina persuna che sefatschenta cun patratgs finals. Cheu ei gia savens gidau sche ins teidla tier e pren serius il concarstgaun. Schar sentir ch'el ei buca persuls e ch'el sa quintar cun amitgs. Dil reminent fa ei bein a mintgin da nus da svidar ora il cor inagada ni l'autra a zatgi che pren temps. Quei sa succeder tier in bien amitg, en confessiunal ni tier il psichiater. Tier il davos menziunau ei quei denton colligiau cun certi cuosts. Da prender fetg serius ei la smanatscha da far suicid ed il tschintschar dil suicid. Il meini public che quel che tschontscha dil suicid fetschi buca «ei», ei deplorablamein totalmein fallius. Ei secloma plitost: Tgi che tschontscha da suicid, fa in di suicid. In studi ha mussau che mintga tiarza persuna che ha priu la veta ha fatg paleis sia intenziun cuort avon si'acziun finala!

### Cultura e suicid

Il problem dil suicid ei aschi vegls sco la carstgaunadad sezza. El ei era ina atgnadad dil carstgaun. Tier ils animals ei aunc mai vegniu observau in suicid, qvd. il prender a sesez la veta ord libra voluntad. Denton ha il suicid svegliau en tuttas culturas in agen sentiment. Era ei quei problem vegnius sligiaus sin pliras modas. Ch'igl ei buca natural, gliez vesa mintgin en, mo co vegnir a frida cun quei problem. Aschia creeschon differentas culturas in ritus da suicid che vegn acceptaus sch'il probant observa exact las reglas e las fuormas perscretas ni usitadas. Tier ils Japanes ei il harakiri enconuschents. Ils Grecs preferevan da beiber ord il buccal da tgitgida. Ils Romans fagevan bogn e tagliavan si las aveinas. Las viewas ell'India derschan benzin sur lur corps e dattan fiug. Tgi che prendeva sia veta tenor il ritus cultural perscrets vegneva aschia buca sbittaus dalla societad ed era acceptaus. Plutarch laschava purtar tuttas giuvnas, che fagevan suicid, niuas sur la piazza fiera. Quei era per las giuvnas ina aschi gronda vergugna ch'ellas senuspevan da prender a

sesezzas la veta. L'etica cristiana scamonda al carstgaun da far suicid. La veta ei in schenghetg da Diu, e mo lez ha da decider sur veta e mort. Tgi ch'observava buca quellas reglas e fageva tonaton suicid, lez vegneva satraus sper il santeri, ni en in liug special dil santeri. Mintga cultura ha sias leschas e ses ritus e nus vesein ch'ins ha adina emprau da dumignar enzaco quei problem. Oz dat ei gia gronds moviments che vulan defender las ideas che mintgin sappi prender sia veta sch'el vul. Gia ein els i aschi lunsch, ch'els offereschan broschuras che cuntegnan las differentas metodos da far suicid. Oz ei la cardientscha deplorablamein gia senza remiers e cuncienzia.

### *Epidemiologia dil suicid*

Ella vegliadetgna denter 14 tochen 41 onns ei il suicid en Svizra oz la secunda stedia mort. Igl onn 1980 ein 1621 persunas mortas tras suicid e 1318 tras accidents sin via. En Svizra fan sin 10 000 persunas 20 suicid, ell'Italia 7 ed en Frontscha 17. Per quellas differenzas fan ins valer plirs facturs: la cultura, il tip da carstgaun, il clima, la confessiun, la historia, il secuntener viers il suicid e las leschas. Duront las duas uiaras mundialas ha ei dau ils pli paucs suicids en Svizra. Ina fetg dira lavur corporala provochescha buca il suicid. Ina greva frida ella veta ei concernent il suicid era buca aschi malsegira sco pintgas confruntaziuns e tulanems che cuozzan duront onns.

### *Tgi ei periclitau?*

Naturalmein savein nus buca metter tuts el medem sac. Mintga cass duess vegnir sclarius giu fetg individualmein. Tonaton sa ins trer certas conclusiuns.

La pli gronda part dils suicids ei ina acziun da panica. Vegg il probant sur sia momentana difficultad ô, sche eis el spindraus e vegn maina pli a far ina secunda emprova. Quei ei lunsch ora la gronda part. Quei ei era il motiv e l'obligaziun d'adina empruar da spindrar mintgin che fa suicid. Ha quei carstgaun dumignau sia crisa momentana, allura eis el ametsch. Quels pazients che fan adina puspei ina emprova ein ina fetg pintga gruppa, ed a quels reussescha ei il bia in di. Denton ei quei ina fetg pintga part cumparegliau cun tschella. Differenziau sto ei vegnir denter ina emprova ed il success e denter las metodos. Eis ei ina metoda cun segir success, ni forsa plitost ina emprova per dar sinzur al concarstgaun ed agl ambient ch'ei mondi mal cun

ins. Ils giuvens prefereschan plitost las metodos buca aschi segiras e finalas. Tier ils vegls ei la metoda denton plitost definitiva e drizzada ora sin seguir success. La statistica muossa a nus la suandonta successiun dallas pli frequentas metodas: 1. Sepender, 2. Sesittar giu, 3. Ir ell'aua, 4. Intoxicaziun, 5. Monooxid carbonic, 6. Seglir ord aultas distanzas, 7. Seglir el tren.

Ils motivs da far fin cun la veta san esser fetg differents. Tier ils carstgauns giuvens ein els il bia difficultads cun la scola ni emprendissadi, savens era difficultads ell'amur ni el svilup pubertar. Tier pli vegls ein savens grevs problems personals la cuolpa. Tier glieud veglia ei il suicid oz puspei fetg derasaus. Seigi quei ch'els san buca pli tgei pigliar a mauns ella pensiun, ni ch'els ein tut persuls e solitaris e san buca pli tgei entscheiver en cun lur veta. Ils carstgauns ch'emprovan adina puspei il suicid ein fetg savens sensibels ni ch'els piteschan da grevas malsognas spirtalas u corporalas. Periclitatus ei atgnamein mintgin da nus inagada ni l'autra. Ei dat forsa silpli glieud ch'ei pli periclitada, denton dat ei cheu neginas reglas e recepts.

La tresta fin savein nus parter grobamein en treis pass:

1. – Il probant patratga vidlunder e peisa giu ses patratgs: duei jeu ni duei jeu buc. En quella fasa eis el il bia depressivs.
2. – Il probant ha ina relaziun ambivalenta viers ses patratgs e sias finamiras. Oz fetschel jeu ei, na damaun. En quella fasa eis el il bia malruasseivels.
3. – Il probant pren il conclus da far ei. Ussa eis el fetg ruasseivels e croda buca pli si. Ussa ha el lutgau ditg avunda ed ha finalmein priu sia decisiun definitiva. Il grond ruaus avon il stemprau, numnan ins era quella fasa. Quei ei era il motiv che nus essan savens surstai, sche nus udin d'in suicid. Aschia audan ins adina puspei il suandont: ler era el aunc d'ina schi buna luna.

### *Conclusiun*

Mintga suicid che succeda en nies miez pertucca era in tec mintgin da nus. En nies temps da preschas e da stress ha il carstgaun ch'ei buca schi resistibels dubla grevezia. Sche nus essan en nies temps modern d'ina immensa tecnica buca habels da dar a nos concarstgauns in per sempels sentiments humans, allura ei tut nossa beinstonza e nies success tecnic vans. Mintga suicid ei in clom buca udius d'in carstgaun solitar.